

Backesverzellercher I

Önn den Därwer öm Westerwald
stiehn medden drönn, meist zemlich ald,
gemouert möt Brochsteen - Wackeser
für Brud zö backen, de Backeser.

Önn suen Backes wur net elen
Brud backen für d' ganze Gemeen.
Wenn Hochzeitschmouß orrer Kärmes war
wur och manch schön Stöck Kochen gar.

Ob et nu Rimmels, Käskochen möt Kümmel,
Siwwenkächtches orrer Griefs möt Zwiwel,
orrern Gwetschenkochen noch hönneno -
für jeren Geschmack war der Backes do.

Beim Enstochen gowet och aldemo Brackes
wenn sich zwien drowen mött Schanzen beim Backes :
" Watt säd der Een, zoröck sall ech stohn ?
datt gät net, mer hann dön Däsch ald, gohn !"

"Önn mir kannst du Grußmaul mo gar nex verzellen,
du hättst dech derirscht mo anmüssenmellen!
Ött war nur off dö Tafel der Namen zö schraiwen
statt Dehem hönnern warmen Öwwen zö bleywen."

Datt Geschänn, öt wur alt ömmer scherwer :
"backen dann he nur de Üwwerderwer?
datt wär mer jo ön schön durnanner --
Jo,- worömm dann net mörönanner?"

"Ech hann vergäsen mech anzömellen,
ens wölln mer vergäsen os anzebellen.
Ött nützt jo nex, mich noch anzezacken
mer han och ald fröher zesammen gebacken!"

Watt öm Backes passierte bliff net gehen,
dat wosste morn de ganze Gemen.
Drömm schwemm wat gedohn, dett dö Loft wirrer klar
watt uss öm Backes kümmt öss ömmer schön gar.

Backesverzellercher II

Em Fröhjahr, kumm hatten de Böm geblöht
 gowet für de Können ön neue Fröd:
 dö Mannenmekeser zuchen von Gemeen ^{no} Ze Gemeen
 de warn jo en jerem Backes dähem.

Kässelsflecker ön Fahrensleut,
 ön watt soß noch dur de Gejend zeut,
 de schlewten öm Backes ower Bösch Strüh
 annern Dachs wur sö verbrannt - wejn dön Flüh.

Der beste Ort wert och für Räuber önn Schandarm
 öt war jo vom Backen ömmer schön warm.
 Och wurn vill domme Dönger gemaacht
 stibitzte Zegan wurn hemlich geraacht.

Dö Juchend von fröher, wat warn de durchdriwwen,
 vill Stöckcher sein dovon noch üwrichgebliwwen.
 Su hatte mo eener off enn Wette getronken
 dem wur nachts om Haimwech noch mie we bedomben.

Hä feel en dön Grawwen, bal hätte gegrösch
 könn ech doch nur noch dön Backes erwösch!
 De annern nohmen sech senger an
 möt der Gemeenskarr wure nom Backes gefahrn.

Am annern Marjen warn de Poppen am danzen,
 en Frau kom gefahrn möt ner Schubkarr voll Schanzen.
 Enstochen wull se -- de Tür knallt se zo
 se läeft zom Dorf nen -- o jojo, o jojo! --

"Möt wösdem Gesicht un struwelischem Haar
 leit eener öm Backes, der ös net ganz gar!"
 Döt halve Darf kom schwenn angeröckt,
 doch der wöste hatte sech hemlich verdröckt.

Backesverzeller III

Ön dann, wär hätt dat net gewosst,
de Quetschen, Bern ön Äbelshost
ward schönste noch öm ganzen Jahr.
Do säht jo keener, dass net wahr.

Marn ze Owend watt ön Lost,
dö irschde Bern ön Äbelshost.
Bei Wällms war annerndachs watt loss
wur offgeroumt do letzte Schoss.

Stöhl ön Kärf wurn offgestallt,
ön goot gestocht, weiß dussen kalt.
Sechs Kärf voll Schnötzeln moste mer han,
de Backerhörtcher warn zemlich lang.

Zwo, drei Stonn brochte mer zom Schellen,
ön der Zeit kann mer sich vill verzellen.
Doch domet war mer schwenn öm Zoch:
"Watt nicht dann euer Erem noch?"

"Der, dem geret jo vill ze goot!
Om Gedreng-Maad grije ön nöyen Hoot."
"Ön nöyen Hoot? Altwirrer ön Hoot?
Der Aale war doch warhaftich noch goot!"

We döckes war och der Backes möt dran,
wenn zwae do möt anfangen, sech gerzehan.
Ganz saafde beim Häemgohn noch hönner den Dürn
ganz saafde, ött soll jo och soss kener hürp:

"Marn ze Owend, öm zwölf - halwer een
mos ech öm Backes bei de Schnötzelen sehn.
We wär dat, Mareychen, könntst mer helfen darbei?
Dat öss doch en schöne Arwet für zwei."

Ött wur jo en beschen rut ömm Gesicht.
"Jo Henner, ech kummen ön halen dö Licht,"
No den Schnötzeln ze sehn broch mer keen Stonnen
doch de zwäe hatten für sech vill Zeit gewonnen.

Mer kann off der Backesbank noch en beschen setzen;
Ött war jo och noch vill ze böschwetzen!
Öm Darf schleef Alles - Maan, Frau ön Könner,
öm Stall de Köh, de Ossen ön Rönner.

Off der Hurt de Hohner ön der Gückel,
öm Scystall de Ferkel ön de aal Mückel.-
Öm Backes de zwäe, de hatten sech gern,
Ött roch su goot no gebackenen Berrn.

Önn der Äescheck knestert ön flackert noch Glut
Leecht huscht dur den Backes, mo gell, mo rut.
Off äemo sehn de zwäe sech öm:
"Ech glöwen, de Naacht ös alt sierno römm!

Ens mosen mers schwenn off den Häemwäch begäen,
mer hürt alt öm Darf de Güggeler krähn!" --
Su öss dat öm Lewwen, äemo schön, aldemo schwer.
Watt wär awwer ön Darf, wenn der Backes net wär !

Backesverzelleher IV

Öm Härfst, dann kom der Flaas noch ren.
Der Backes war dann ze korz ön ze kleen:
Dann wur gereffelt, gebrähd, gehehelt, geschwongen,
dobei manch schön Ledchen zom Dorf ren gesongen.

Owens heng de Lücht ower der Dür anem Brett.
Datt warn noch Zeyren, de vergesst mer net!
Mer brochte käen Fernseh, Käen Radio,
ött war jo noch ömmer der Backes do!